

Te moriente perit pax, fama jacet, bona quisque  
 Raptor habet, passim vis sine lege furit.  
 Militis officium non iudicis evacuavit  
 Miles iudexque fortis et æquus eras.  
 Templi, Deum, viduas, reparando, colendo, cibando,  
 Martha, Maria, pius Samaritanus eras.  
 Armis, lege, minis, hostesque tuosque domabas.

A Corripiens poena facta, futura metu  
 Dona bonis, veniam miseris, poenam sceleratis,  
 Largus, mansuetus, jura tuenda dabas.  
 Armorum, pacis quia fortiter et sapienter  
 Res pertractasti, Cæsare major eras.  
 Servus, iustitia, templum, Martisque secunda  
 Cæsar, causa, locus, lux tibi mortis erant.

ANNO DOMINI MCXXX

# BALDRICUS

## DOLENSIS ARCHIEPISCOPUS

### NOTITIA HISTORICA

(Gall. Christ. vet. t. II, p. 566)

Baldricus, abbas Burguliensis in Andibus, revo suo celebris scriptor, ad Dolensem præsulatum electus ipsomet die natalitiorum sacratur anno 1114, de quo hæc scribit Ordericus Vitalis, Anglus, *Historiæ ecclesiasticæ* l. ix: « Præfatum seniore, quam bene agnovi, veneranter honorare decrevi. Hic civis fuit Aurelianensis, monachus et abbas Burguliensis, liberalibus imbutus studiis, et religiosæ meritis vitæ venerabilis: inde pro religione et sapientia ad gradum Dolensis archiepiscopatus electione proventus est ecclesiastica; in episcopatu monachatum servavit, et cum monachis, prout sors dabat, plerumque habitabat. Indomitis enim Britonibus præerat, quorum perversitatem tolerare non poterat, unde protervos et exleges frequenter deserebat; et in Northmanniam fugiebat, ubi Dolensis Ecclesia super Riselam fluvium a temporibus S. Samsonis, regnante Hildeberto rege Francorum, fundos habebat, et quiete pacificeque possidebat. Ibi scriptis et dogmatibus suis auditores suos ad Dei cultum incitabat, et vicina cœnobia, Fiscannum scilicet ac Fontinellam, atque Gemmeticum, aliaque plura visitabat; in timore Dei, sacris sermonibus confortabat. Tandem in senectute bona defunctus est; et Pratellis in basilica S. Petri apostoli ante crucifixum sepultus est. » Pallium vero acceperat a papa Paschali II in concilio Remensi, cui adfuit; nominatur et archiepiscopus, investitura cujusdam Ecclesiæ facta, a Girardo Engolismensi episcopo et apostolico legato; item in compluribus chartis tabularii Burguliensis ac Fontebraldensis. Varia reliquit operum monumenta, de quibus Ordericus libro ix, citato, inprimis quatuor libris Historiam Hierosolymitanam, quæ in volumine Orientalium expeditionum per Francos edita est, in collectione Jacobi Bongarsii, eruditi auctoris Galli. In præfatione operis ait ipse Baldricus se hoc prope sexagenarium cœpisse; orditur autem ab anno 1095, quo initium habet memorabilis ista in Orientem peregrinatio, et desinit in expugnatione Hierosolymitanæ urbis: ex eadem etiam liquet ipsum interfuisse concilio Claramontano; sed audi verba Orderici: « Baldricus Dolensis

B archiepiscopus quatuor libros luculenter conscripsit, in quibus integram narrationem ab initio peregrinationis ad primum bellum post captam Hierusalem veraciter et eloquenter descripsit. » Vitam quoque B. Samsonis episcopi elucubravit, uti et pontificum Dolensium gesta, item S. Hugonis Rothomagensis archiepiscopi Vitam ms. in quibusdam bibliothecis; præterea Vitam Roberti Arbrissellensis, ordinis Fontebraldensis institutoris, jubente Petronilla prima abbatissa, et in proœmio sic loquitur: « Sarcinam grandem et gravem imbecillitati nostræ, domina Petronilla, imposuisti, cum me et multa mundi fluctivagi inquietet procella, et maxime minoris Britannicæ, in qua cum scorpionibus habito, bestialis geminaque circumvallaverit ferocitas. » Hoc opus primum eruit, notisque recensit Michael Cosnier, Pictaviensis parochus. Poesi delectabatur quoque, et nonnulla carmina historica condidit, in quibus sese Baldricum Andegavensem, ac abbatem Burgulii indigitat. Cæterum Aurelia ipsa non oriundum, prout citatur ab Orderico, at Magduno ad Ligerim natum, ex quodam ipsius poemate observavit in suis *Analectis* Cosnierus. Carmina autem Baldrici e veteri codice Petaviano primum edidit, ac publicavit Franciscus Duchesnius, regius historiographus, tom. IV *Historiæ Francorum Scriptor.* Andræ, patris doctissimi viri. Mortalitatem explevit tandem die 7 Januarii 1131, et hoc habet epitaphium in æde S. Samsonis supra Rillam: *Notum sit presentibus et futuris, quod Baldricus bonæ memoriæ Dolensis Ecclesiæ archiepiscopus dedicavit hanc ecclesiam in honorem B. Virginis Mariæ et B. Petri apostolorum principis, et S. Samsonis beatissimi confessoris, viii Idus Decembris, anno ab Incarnatione Domini 1129. Eodem anno dedicavit ecclesiam S. Laurentii de Marisco, vi Idus Decembris, quæ sunt juris sanctæ Dolensis Ecclesiæ. Qui Baldricus rexit Ecclesiam Dolensem xxii annis et xlii diebus; tricesimo autem die post consecrationem hujus presentis ecclesiæ obiit in Christi confessione, et Pratellis dormit. Cujus anima æternam requiem possideat.*